

Юректен айтылган сөз
юрекке етер.

БАГЪЧАСАРАЙ

№ 24 (101)

ДЕВЛЕТ ДУМАСЫНЫНЪ МЕБЮСИ БАГЪЧАСАРАЙНЫ ЗИЯРЕТ ЭТТИ

Русия Федерациясы Девлет Думасынынъ мебюси Руслан Бальбек кечкен афта Багъчасарайга иш зияретинен теширф буюрди. Багъчасарай районынынъ башы Рефат Дердаровнен бераберликте Багъчасарай тарихий-медений ве археологик музейинде шимдики кунде Хансарайда кечкен реставрация меселесини огренди. Къайд этмек керек ки, проект боюджа Хансарайнынъ Буюк Джамисинде янъидан тамирлев ишлери кетмекте. Джамиде намазлар отъкерильмей, лякин 2018 сенеси башлангъанынен мында джума намазларыны кечирмеге мумкюн оладжакъ. Айны вакытта реставрациянынъ экинджи басамагы девам этеджек.



Корюшов черчивесинде музей-къоругъынынъ баш къоруйджысы Оксана Алпашкина мусафирлерге Алла Тамакъта олып кечкен археологик экспедиция не-тиджесинде тапылгъан алтын ильванларны такъдим этти.

Хансарайны зиярет эткен сонъ, мебюс Хан-Чайыркъа ёл алды. Мында о, «Ватан» дин джемиетининъ векилинен корюшюп, джамининъ этрафыны бакъып чыкъты. Руслан Бальбек ишандыргъанына коре, джамининъ янъында спорт комплекси къурулма-сы планлаштырыла.

ФОТОРЕСИМЛЕРДЕ: Оксана Алпашкина алтын ильванлар акъкъында икяе эте; Хансарайда реставрация ишлери алып барыла; Руслан Бальбек ве Рефат Дердаров «Ватан» дин джемиетининъ азасы иле субетлеше.

ДЕВЛЕТ КОМИТЕТИНИНЪ НЕЗАРЕТИ АЛДЫНДА



Миллетлерара ве сюрگون этильген граждандарынынъ ишлери боюнда девлет комитетининъ башы Заур Смирнов салы куню Багъчасарайда иш зияретинен булунды. О, Багъчасарай районынынъ башы Рефат Дердаров, Багъчасарай район мемуриетининъ башы Александр Трянов, район мемуриетининъ хадимлери ве къуруджылыкъ ишлерини алып баргъан тешиклятыннынъ векиллери иле федераль макъсаций программа черчивесинде къурулаяткъан объектлерни,

яни Джейхан мааллесинде 260 ерлик бала багъчасынынъ ве Мира сокъагъында 600 ерлик мектепнинъ мейданларыны бакъып чыкъты.

Бундан сонъ Заур Смирнов Багъчасарай районынынъ мемуриетинде мушавере кечирди. Топлашув черчивесинде федераль макъсаций программасы боюнда къурулаяткъан объектлернинъ къурулуш муддети, квартираларнынъ улештирмеси киби меселелер бакъып чыкъылды. Рефат Дердаров репрессияларга огърагъан халкъларнынъ векиллери арасында чокъусы койлерде яшагъанларыны сеслендирди. «Эгер де койлерде яшагъанлар ичюн шеэрде янъы эвде квартира алмагъа имкян ачылса, баягъ проблемалар чезилир эди», - деп къайд этти районымызнынъ башы. Заур Смирнов бу фикирге къол тутып, оны къанунны бозмайып керчеклештиреджегини ишандырды.

ФОТОРЕСИМЛЕРДЕ: Джейханда бала багъчасы къурулаяткъан мейдан; мушавереден левха.

Къартларга дикъкъат айырылды



Кечкен джума куню Багъчасарай районынынъ башы Рефат Дердаров ве «Миллет» телеканалыннынъ баш мудир Эврин Мусаев Акъмесджитте ерлешкен къырымтатарлар ичюн къартлар эвнини зиярет этип, анда яшагъан ватандашларымызны кечкен мукъаддес Къурбан байрамнынъ хайырладылар. Мусафирлерни эмек ве ичтимай къорчалав назирининъ муавини Лариса Францишко, Акъмесджиттеки къартлар ве сакъатлар ичюн пансионатынынъ мудир Вадим Михайлин ве къырымтатарлар ичюн къартлар эвнининъ рехбери Пакизе Абхаирова къаршыладылар. Рефат Дердаров ве Эврин Мусаев къартларнынъ алхатырларыны сорап, оларга кетирген эдиелерни багъышладылар. Къартлар Багъчасарайны зиярет этмеге истегенлерини айттылар. Районымызнынъ башы тез вакытта оларнынъ умютини керчеклештирмеге тырышаджакъыны ваде этти.

ФОТОРЕСИМДЕ: къартийлер Эврин Мусаевге озъ аятлары акъкъында икяе этелер.

МЕДЕНИЕТ

Эски авалар эски шеэрде



Медениет назирлигининъ къолтутувынен Хансарайда «Къырым» аглы къырымтатар фольклор ансамблининъ концерти олып кечти. Белли олгъаны киби миллетимиз арасында чокъу севилип къалгъан такъымгъа Украинада ве Татаристанда нам къазангъан санат эрбабы Сервер Какура рехберлик япмакъта.

Концертке кельген мусафирлерни меракълы программа баклей эди. Къырымтатар халкъ оюнларыны, вокаль ве оюн композицияларыны, йырларны белли артистлер иджра эттилер.

ФОТОРЕСИМЛЕРДЕ: концерттен левхалар.



Саифени Гульнара ИЛЪСОВА азырлады.